


TEZAUUR LITURGIC
5 IANUARIE

SLUJBA
SF. CUVIOS
SIMEON JELNIN
DE LA
PSKOVO-
PECERSKA



MINEIUL PE IANUARIE
MOSCOVA



Ме́сяца ианнуа́риа в 5-й день

Преподо́бнаго Симео́на

Пско́во-Пече́рскаго

На вели́цей вече́рни

Блаже́н муж: 1-й антифо́н.

На Го́споди,воззва́х:поём стихи́ры,глас 1

Подобе́н: Небе́сных чино́в:

Я́ко дре́во многопло́дное, во оби́тели Пече́рстей преподо́бием процвёл еси́, о́тче Симео́не преблаже́нне, елее́м трудо́в жити́е твоё ума́стив, ра́дуясь, в селёния райская предста́вился еси́, и досто́йная по́тов твои́х прие́млеши воздая́ния.

Измла́да божёственную мы́сль прие́мь, стра́хом Бо́жиим огради́л еси́ себе́, о́тче Симео́не богодухнове́нне. Те́мже, ино́чества у́зкий путь избра́в, чи́стаго жити́я твоего́ добро́ту показа́л еси́ и послуша́ния яви́л еси́ о́браз.

Незло́бием и кро́тостию украша́емь, любо́вь Христо́ву стяжа́л еси́, о́тче Симео́не богоприятне, ёю́же первозда́нный в челове́цах

о́браз зря, ду́ши мно́гия ко спасе́нию привёл еси́,
от дре́вняго змя́ лука́вства тех огражда́яй.

Сла́ва, глас 6:

От до́льняго к го́рнему про́мыслом
Боже́ственным свы́ше направля́емь, тѣлом к
пеще́рам богоздáнным прите́кл еси́, душе́ю же
на го́ру небѣ́сную возне́слся еси́: и нас ускори́ к
восхожде́нию на вы́соту́ духо́вную, Симео́не
преподо́бне о́тче наш.

И ны́не, Богоро́дичен, глас то́йже.

Вход. Прокі́мен дне. И чтѣ́ния 3
преподо́бническая.

На литіи стихи́ры самогла́сны, глас 4:

Тле́нныя ми́ра сегó красotý убежа́л еси́,
бу́дущих восприя́тия возжелѣ́в сокрови́щ, и в
ти́хое пристáнище прите́кл еси́, Симео́не, иде́же,
по́стническое течѣ́ние сконча́в, дарова́ний
Боже́ственных сокрови́ще яви́лся еси́, и нам
благода́ть от моще́й твои́х источи́, честное
успе́ние твоѣ́ сла́влящим.

Саро́вскому чудотво́рцу от ю́ности подража́я,
того́ ра́дость о Го́споде стяжа́л еси́ и к лю́дем
вѣлию́ любо́вь яви́л еси́, Симео́не, свѣ́том

благочестія вся просвещая и подавая верным исцеления, темже радость духовную молитвами твоими испроси всем, память твою святую совершающим.

Велию подвига иноческаго ревность показуя, в келью пещерную затворился еси и тамо, яко безплотен, пожил еси, Симеоне, от духов нечистых стужения приемый, ныне же ангельскаго сподобився ликостояния, к милосердию Божию с ними воззови о всех, любовью ты почитающих.

Слава, глас 8:

Земли Печерския процветение, сторицею плод умноживый, дар молитвы к Богу стяжал еси, имже обилие плодов земных от земли неплодных испросил еси, напитав зело обитель твою, о, Симеоне преславне, неплодствие душ наших претвори, да сподобимся принести Господу достойныя плоды покаяния.

И ныне, Богородичен, глас тойже.

На стиховне стихиры, глас 5.

Подобен: Радуйся, живоносный Кресте:

Ра́дуйся, преподо́бне Симео́не, исто́чнице чудес неисчерпае́мый, всем, с ве́рою к тебе́ зыва́ющим, был еси́ безме́здный врач и ско́рый помо́щник, неду́ги душе́вныя разреша́я и боле́зни телесныя утоля́я, те́мже и ны́не честны́я мо́щи твоя́ струи́ исцелений исто́чают неоску́дно: моли́ Христа́ ниспосла́ти нам ве́лию ми́лость.

Стих: Честна́ пред Го́сподем смерть преподо́бных Его́.

Ра́дуйся, преподо́бне Симео́не, воздержани́ем плотскы́я страсти́ в себе́ умертвив, власть на ду́хи нечи́стыя от Бо́га прия́л еси́ и человекогуби́теля посра́мил еси́, егда́ постом, моли́твою и смире́нием ко́зни вра́жия разоря́я, ду́ши стра́ждущия свобожда́л еси́, те́мже моли́ Человеколю́бца дарова́ти душа́м на́шим ве́лию ми́лость.

Стих: Блаже́н муж, боя́йся Го́спода, в за́поведех Его́ восхо́щет зело́.

Ра́дуйся, преподо́бне Симео́не, ми́рен дух и се́рдце чи́сто стяжа́в, проро́ческаго сподо́бился еси́ да́ра и тайновиде́ц предивны́й яви́лся еси́, премудро́стию Бо́жиею озаря́емь, мно́гия от бед

избавил еси и неврежденны от пагубы сохранил еси, и ныне моли Христа Бога даровати душам нашим мир и велию милость.

Слава, глас 6:

Брѣнныя славы бѣгая, венцемъ нетленнымъ увенчался еси и, смирениемъ украсився, велие дерзновение предъ Богомъ стяжал еси, Того непрестанно моли, Симеоне, даровати намъ прегрешений оставление, во еже спастися намъ.

И ныне, Богородичен, глас тойже.

На благословении хлебов, тропарь святаго дважды, и Богородице Дѣво: единожды.

Тропарь, глас 1:

Любовию Христовою сердце твое уязвивый, евангельски Тому последовал еси: яко древний подвижникъ преподобиемъ украсивыйся, славный насельникъ обители Богоматери у пещеръ Богомъ зданныхъ явился еси, и, благодать духовную свыше приемъ, подаеши вернымъ исцеления, Симеоне богоблаженне, не престаи молитися о чтущихъ тя.

На ўтрени

На Бог Господь: тропарь святаго, дважды.

Слава, и ныне, Богородичен гласа.

По 1-м стихословии седален, глас 8.

Подобен: Повеленное тайно:

Благода́тию свѣше о́сиянный, па́стырь до́брый яви́лся еси́, преподо́бне Симео́не, и, ве́лие попече́ние о ча́дех твои́х прилагáяй, огра́ду па́жити духо́вныя твоея́ невреждѣ́нну соблю́л еси́, те́мже и нас предста́тельством твои́м сохрани́ и овца́м избра́нным Христо́ва ста́да моли́твами твои́ми сопричти́.

Слава, и ныне, Богородичен:

Пресвята́я и пренепоро́чная Де́во, у Креста́ возлю́бленнаго Сы́на Твоего́ яви́лася еси́ всем христиа́ном Ма́ти Преблагáя, те́мже к Тебе́, упова́ние на́ше, в ско́рби душе́вной припада́ем, вопи́юще: прости́ ма́терски ру́це Твои́ ко Престо́лу Влады́чню и моли́ся, Пречи́стая, о душа́х на́ших.

По 2-м стихословии седален, глас 3.

Подобен: Дева днесь:

Во обители Пречистыя труды монашеския смиренно понесла еси, Богородицу любовью немолчно песнослова, сего ради, отче Симеоне, еще на земли сый, собеседник избранный Божия Матере явился еси, ныне же, у Престола Царя славы предстоя, со Владычицею Небесною не престаи молиться о спасении душ наших.

Слава, и ныне, Богородичен:

Явилася еси в скорбех утешение и в бедах Предстательница, Заступница еси обидимым и ненадежным надежда, темже Тя, яко упование спасения нашего по Боже стяжавше, в молении сердечном к Тебе припадаем и усердно молимся: всенепорочная Дево, со угодником Твоим Симеоном помози спастись душам нашим.

Величание:

Ублажаем тя, преподобне отче Симеоне, и чтим святую память твою, наставниче монахов и собеседниче Ангелов.

По полиелѣи седален, глас 4.

Подобен: Удивися Иосиф:

Приидите, вернии, ублажим святаго Симеона, иже, выотою дел в божественную доброту одеяся и сосуд небесных дарований явися, от негоже богатныя милости неоскудно приемлюще, верою и любовию зываем: радуйся, Симеоне, преподобне отче наш.

Слава, и ныне, Богородичен:

Радуйся, Пречистая, архангельский глас слышавшая, Слова бо неизреченнаго вместилище и Рождества несказаннаго Мати, безсловесие душ наших разреши, да устнама радости по достоянию восхвалим Тя: радуйся, Царице небеси и земли, Тобою бо всякаго зла избавляемся.

Прокимен, глас 4: Честна пред Господем смерть преподобных Его. Стих: Что воздам Господеви о всех, яже воздаде ми? Всякое дыхание: Евангелие от Матфея, зачало 43.

По 50-м псалме стихира, глас 6:

Днесь светлаго торжества радование и душам нашим веселие бываает: новаго бо молитвенника

тя пред Богом обретаем, преподобне отче Симеоне, пещера убо отверзется, и гроб не удержат чудоточных мощей твоих сияние, имже озаришася вси вернии, в светносный день прославления твоего сошедшиися, темже вкупе небесная и земная веселия всякаго исполняются, и Господь во святых Своих прославляется.

Канон преподобнаго, глас 8.

Песнь 1

Ирмос: Колесницегонителя фараона погрузи чудотвори иногда Моисейский жезл, крестообразно поразив и разделив море, Израиля же беглеца, пешеходца спасе, песнь Богу воспевающа.

Днесь в доме Пречистыя сошедшеся, вернии, Духом Божественным веселящеся, преподобнаго Симеона восхвалим, той бо всем житием своим непрестанно песнь Богу воспевал еси.

Яко семя на ниве веры истинныя, в вертограде Пренепорочныя Жизнодавцем насажден быв, плод добрый сторицею принесл еси и множества верных напитал еси, песнь Богу воспевай.

Благими нра́вы измла́да укра́шен, за́поведей Бо́жих иску́сный де́латель был еси́ и, о́ко серде́чное, взира́ющее к Бо́гу, име́я, о́тче Симео́не, Боже́ственных даро́в и чуде́с испо́лнился еси́, песнь Бо́гови воспева́яй.

Богоро́дичен: Богороди́тельнице всенепоро́чная, всем ве́рою испове́дающим Тя на вся́ком ме́сте и покланя́ющимся Твоему́ свято́му о́бразу, моли́ Сы́на Твоего́, Христа́ Бо́га на́шего, изба́вление дарова́ти от страсте́й и бед, песнь Ему́ воспева́ющим.

Песнь 3

Ирмо́с: Утвержде́й в нача́ле небеса́ разумом и зе́млю на вода́х основа́вий, на ка́мени мя, Христе́, за́поведей Твои́х утверди́, я́ко несть свят па́че Тебе́, еди́не Человеколю́бче.

Весь прилежа́ Вседержи́телю, преподо́бне о́тче Симео́не, Тому́ прилепи́лся еси́ от ю́ности, и нас, ве́рных ча́д твои́х, научи́ похваля́ти Святу́ю Трои́цу: несть свят па́че Тебе́, еди́не Человеколю́бче.

Любо́вию Боже́ственною укрепля́емь, о́тче наш Симео́не, чудотво́рцу Са́ро́вскому после́довал еси́, и ны́не вку́пе с ним и все́ми

святы́ми воспева́еши: несть свят па́че Тебе́,
еди́не Человеколю́бче.

Стра́сти плотскія умерщвля́я, о́тче Симео́не,
ду́шу обогати́л еси́ Божество́нными дарова́ньми,
и сими́ мно́жество к тебе́ притека́ющих
уврачевал еси́, науча́я тех пе́ти: несть свят па́че
Тебе́, еди́не Человеколю́бче.

Богоро́дичен: К Тебе́, Богоро́дице всепе́тая,
приле́жно притеце́м, недосто́йная ча́да Твоя́,
гре́шнии и смире́ннии, и припаде́м, в покая́нии
зову́ще из глубины́ души́: Влады́чице, моли́твами
уго́дника Твоего́ преподо́бнаго Симео́на сотвори́
спастися́ нам, вопию́щим: несть свят па́че Тебе́,
еди́не Человеколю́бче.

Седа́лен, глас 4:

Страсте́й умерщвля́я волчцы́, о́тче Симео́не
пресла́вне, ду́шу твою́, я́ко зе́млю добропло́дную,
возде́лал еси́ и, по́том мно́гих болéзней и трудо́в
оби́льно ю́ ороша́я, дави́дски процвёл еси́, я́ко
крин райский, сего́ ра́ди тя велича́ем.

Сла́ва, и ны́не, Богоро́дичен:

Молю́ Тя, Пречистая Ма́ти Бо́га вы́шняго,
еди́но души́ моея́ утеше́ние, упова́ние, сла́досте,
Божество́нный покрóве, све́те, заступле́ние и

спасение! Сподоби мя Твоими молитвами услышати глас, внутрь чертога Владыки верных призывающий.

Песнь 4

Ирмос: Ты моя крепость, Господи, Ты моя и сила, Ты мой Бог, Ты мое радование, не оставль недра Отча и нашу нищету посетив. Тем с пророком Аввакумом зову Ти: силе Твоей слава, Человеколюбче.

Душу твою очистив, преподобне отче Симеоне, храм Святаго Духа соделался еси и, в подвизах добре подвизаяся, горнее Царство наследовал еси. Сего ради Прославльшему ты вопием: силе Твоей слава, Человеколюбче.

Будущее твое прозрев, отче Симеоне, блаженный Корнилий Крыпецкий манной Божественных словес ты напитал и на пажить духовную поставил. Ты же, познав сию сладость, радостно вопиял еси: силе Твоей слава, Человеколюбче.

Многоболезненными страстьми одержимым, отче пречудне Симеоне, даровал еси исцеления силою благодати Христовыя, юже стяжал еси

изрядными делами твоими. Темже с тобою
вопиём: силе Твоей слава, Человеколюбче.

Богородичен: О, Пресвятая Владычице, всех
праведных удобрение и дворе словесных овец,
во уделе Печерстем боголюбиваго Симеона под
честным Твоим омофором возрастившая и
воспитавшая, не остави нас, рабов Твоих, и
моли Сына Твоего и Бога нашего, да спасёт
души наша.

Песнь 5

Ирмос: Вскую мя отринул еси от лица Твоего,
Свете Незаходимый, и покрыла мя есть чуждая
тьма, окайннаго: но обрати мя и к свету
заповедей Твоих пути моя направи, молюся.

Светом незаходимым осияваемь, отче
пресветле Симеоне, возсиял еси на земли, яко
солнце, чада твоя к познанию истины
провождая и к свету заповедей Христовых пути
тех направляя.

В стадо овец духовных преподобномученика
Корнилия пришёл еси, отче наш Симеоне, и вся
земная отвергнув, возшёл еси на небо, взывая к
Богу: к свету заповедей Твоих пути моя
направи.

Ны́не в вы́шних селѣниих обита́я, ча́д твои́х назира́еши, преподо́бне о́тче Симео́не. Те́мже научи́ и нас богоприя́тными твои́ми моли́твами вызы́ати Го́споду: к свѣту за́поведей Твои́х пути́ на́ша напра́ви.

Богоро́дичен: Ра́дуйся, Де́во Всечестна́я, мо́сте, к небесе́м преводя́й, и ле́стнице высо́кая, ко Христу́ нас возводя́щая. Те́мже, Всепѣ́тая, я́ко Ма́тернее дерзнове́ние к Нему́ иму́щи, исцели́ ума́ моего́ омраче́ние и пути́ моя́ испра́ви, молю́ся.

Песнь 6

Ирмо́с: Очи́сти мя, Спа́се, мно́га бо беззаконя́ моя́, и из глубины́ зол возведи́, молю́ся, к Тебе́ бо возопи́х, и услы́ши мя, Бо́же спасе́ния моего́.

Умо́м очище́нным от помышле́ний лука́вых, блаже́нне о́тче Симео́не, в моли́тве непреста́нней пребыва́я и, я́ко свети́льник горя́, вызы́вал еси́ ко Го́споду: из глубины́ зол возведи́ мя, Бо́же спасе́ния моего́.

Обнови́в послуша́нием Христу́ ду́шу твою́, о́тче свяще́нне Симео́не, в вели́кий о́браз обле́кся еси́ и, в пеще́ру Ла́заря прозорли́вца

всели́вся, то́му подража́л еси́, взыва́я: услы́ши мя, Бо́же спасе́ния моего́.

Кре́постию ду́ха, о́тче Симео́не, превозмога́я держа́ву вра́жию, подвиза́лся еси́ вни́ти сквозе́ тесна́я врата́. Те́мже в оби́тели Отца́ Небе́снаго всели́лся еси́, со умиле́нием взыва́я: сла́ва Тебе́, Бо́же спасе́ния моего́.

Богоро́дичен: Не преста́й ходата́йствовати о нас, раба́х Твои́х, Пречи́стая, я́коже Госпо́дь с Тобо́ю бы́ти изво́ли и от бед и скорбе́й изба́ви ны, моля́щихся Сы́ну Твоему́ и воспева́ющих Бо́га спасе́ния на́шего.

Конда́к, глас 6:

Я́ко Бо́жия любве́ зерка́ло, во оби́тели Пече́рстей благода́тно просвети́лся еси́, о́браз ино́ческаго жити́я показу́я, трудолю́бием и послуша́нием на высоту́ добродете́лей восте́кл еси́. Те́мже, да́ры Ду́ха Свята́го от Го́спода почте́нный, чуде́са мно́га ще́дро источа́еши, преподо́бне о́тче наш Симео́не, моли́ спасты́ся душа́м на́шим.

И́кос:

Ду́ха Свята́го сия́нием просвеще́ся, вся, я́же в ми́ре, необину́яся оста́вил еси́, блаже́нне,

многими труды́ плоть покоривый́ дүху, к высоте́ достигл еси́ безстрастія, си́це, благоплодіе души́ твоея́ добродетелей́ дея́нием явля́яй, и́стинную любовь́ к людем стяжа́л еси́ и благода́ть целеній от Бо́га прия́л еси́. Те́мже, и по преста́влении твоем да́ры чудес́ обогаще́нный, по́мощию твоею́ нас не оставя́еши, преподо́бне о́тче наш Симеоне́, моли́ спасті́ся душа́м на́шим.

Песнь 7

Ирмо́с: Бо́жия снисхожде́ния огонь устыде́ся в Вавило́не иногда́, сего́ ра́ди о́троцы в пе́щи радованною ного́ю, я́ко во цвѣтнице лику́юще, пояху: благослове́н еси́, Бо́же о́тец на́ших.

Водо́ю живо́ю, ю́же почерпа́л еси́ у Жизнода́вца Христа́, жа́ждущих напая́л еси́, о́тче наш Симеоне́, и, я́ко и́стинный па́стырь словес́ных овец́, благода́рне взыва́л еси́: благослове́н Бог о́тец на́ших.

Красне́йшее прозябе́ние, преподо́бне о́тче Симеоне́, в дому́ Бо́жием прозябл еси́, и, в моли́твах болѣзнуя о ча́дех твои́х, ихже Пречи́стая тебе́ вручи́, с ве́рою Бо́гу вопия́л еси́: благослове́н еси́, Бо́же о́тец на́ших.

С небесными лики предстоиши, богоблаженне отче Симеоне, Престолу Пресвятыя Троицы, с ними купно и со всеми святыми непрестанно воспевая: благословен еси, Боже отец наших.

Богородичен: К кому возопию, Владычице, аще не к Тебе, Заступнице усердней рода христианскаго? Ты бо Отроча рождши, пребезначальное Слово, обветшавшия грехом обновила еси и пети научила еси: отец наших Боже, благословен еси.

Песнь 8

Ирмос: Седмерицею пещь халдейский мучитель богочестивым неистовно разжже, силою же лучшею спасены сия виде, Творцу и Избавителю вопияше: отроцы, благословите, священницы, воспойте, людие, превозносите во вся веки.

Облецытеся ныне, людие, чтущии память Симеона достохвальнаго, в милосердие, благодать, смиренномудрие, кротость, долготерпение, снисхождение, подражающе Христу, Егоже, отроцы, благословите, священницы, воспойте, людие, превозносите во вся веки.

Нищетою духовною обогатился еси, преподобне отче Симеоне, иноком и всем, приходящим к тебе, образ любви Христовы быв, Егоже, отроцы, благословите, священницы, воспойте, людие, превозносите во вся веки.

Троичен: Троицу Единосущную, Нераздельную, Неслиянную и Пребезначальную днесь, вернии, почтим, Юже, отроцы, благословите, священницы, воспойте, людие, превозносите во вся веки.

Богородичен: Источник неисчерпаемый воды животныя, от потопа греховнаго мир спасшая, Дево Пренепорочная, страсти души моея потопи и прохлади сердце мое, острупленное грехми, да воспою Сына Твоего, Егоже отроцы благословляют, священницы воспевают, люди превозносят во вся веки.

Песнь 9

Ирмос: Ужасеся о сем небо, и земли удивися концы, яко Бог явися человеком плотски, и чрево Твое бысть пространнейшее небес. Тем Тя Богородицу, Ангелов и человек чиновначалия величают.

Преподобне отче Симеоне, яко истинный пастырь овец Христовых, ныне дерзновение имея ко Господу, назираеши стадо твое с горних высот, помози и нам внити во ограду небесную.

Преселился еси, отче наш Симеоне, от привременныя жизни во обители Небесныя, идеже со отцы святыми песнь победную воспеваеши, радуясь, темже и нас, с верою и любовию тебе поющих, от великих бед и скорбей избавити Христа умоли.

О, богоблаженне отче наш Симеоне, в жизни временней на земли не покорився страстем плоти, безстрастием, яко ризою, облеклся еси и сослужитель Ангелов явился еси, темже умоли Христа Бога избавити нас от искушений.

Богородичен: Христа, Сына Твоего, умоли, Мати Дево, согрешений прощение даровати рабом Твоим, Тебе Богородицу воистину проповедающим, и светлости святых и веселия сподоби нас во Царствии Небеснем.

Светилен:

Днесь светло празднует святая обитель твоя, юже честным житием и подвиги, яко звезда

многосвѣтлая, озари́л еси́, о́тче Симео́не, указу́я нам путь ко Христу́, И́же есть Свет ми́ра.

Сла́ва, и ны́не, Богоро́дичен:

Пе́ти Тебе́ сподо́би, Де́во Всесвята́я, Свет бо невече́рний от чре́ва Твоего́ возсия́, и прогони́ мглу страсте́й мои́х, еди́на Всепе́тая.

На хвали́тех стихи́ры на 4, глас 8.

Подобен: О, пресла́внаго чудесе́:

О, богому́дре Симео́не, от ю́ности святы́м отце́м подо́бся, во бде́ниях, моли́твах и посте́х труды́ с боле́зными подъя́л еси́, а́нгельским жити́ем украси́выйся и де́монския полки́ устраши́вый, муж соверше́н вои́стину яви́лся еси́ и ко святы́м Пско́во-Пече́рским причте́н был еси́, с ни́миже за ны́ Христа́ Бо́га мо́лиши.

О, предивне́ Симео́не, ве́ры несумне́нная стяжа́телю, исцеле́ний Божество́нных сосу́д ты зна́ем неиздива́емый, чуде́сы от Бо́га прославля́емъ и от ве́рных пе́снями восхваля́емъ, моли́твенник те́плый днесь возсия́л еси́, те́мже, Престо́лу Христо́ву предсто́я, моли́ дарова́ти нам бога́тыя ми́лости.

О, преблагенне Симеоне, винограда Христова прилежный делателю, яко отец чадолюбивый, тяготу дневную понесл еси, молитвою чад твоих ограждая и любовью души тех возгревая, был еси всем ко Господу путевождь, темже монахов и мирских множество наставника ты непреложна почитает.

Слава, глас тойже:

Чудес зарею облистаеть, ныне явился еси, преподобне, Церкви Русския украшение, обители Псково-Печерския торжество, монахов ликовствующее пение и верных веселия глас. О, Симеоне, усердный наш ходатаю пред Богом, моления наша скоро Ему принеси.

И ныне, Богородичен, глас тойже.

Славословие великое. И отпуст.

На Литургии

Блаженна от канона праздника, песнь 6-я на 4 и святаго песнь 6-я на 4.

Прокимен, глас 7: Честна пред Господем смерть преподобных Его.

Стих: Что воздам Господеви о всех, яже
воздаде ми?

Апостол к Коринфяном, зачало 176.

Аллилуия, глас 6: Блажен муж, бояйся
Господа, в заповедех Его восхощет зело.

Стих: Сильно на земли будет семя его.

Евангелие от Луки, зачало 24.

Причастен: В память вечную будет праведник:

***Утверждена Священным Синодом
Русской Православной Церкви
16.07.2013 (журнал № 84).***

